

ISNIN, 31 OGOS, 1981

Hasrat untuk masa depan

KITA menyambut Hari Kebangsaan yang ke-24 hari ini — perayaan pertama di bawah pentadbiran baru pimpinan Perdana Menteri Datuk Seri Dr. Mahathir Mohamad. Tidak siapa yang dapat menafikan dalam tempoh 24 tahun yang lalu banyak kemajuan telah dicapai. Kita telah sampai ke tempoh Rancangan Malaysia Keempat. Dasar Ekonomi Baru, yang mulanya diterima dengan rasa sangsi oleh suatu pihak dan kurang senang oleh pihak lain, kini telah menunjukkan hasil positifnya. Kemiskinan memang masih wujud, tetapi kadarnya telah jauh berkurang sementara taraf dan kualiti hidup rakyat pada umumnya semakin meningkat. Perpaduan bukan lagi slogan tidak bermakna tetapi suatu hakikat nyata yang telah pun dihayati. Bersamanya juga ialah kesedaran kebangsaan dan rasa banggakan negara yang amat tinggi kini, terutamanya di kalangan generasi muda.

Dasar Pelajaran Kebangsaan telah tercapai sepenuhnya di peringkat pelajaran menengah, dan kebimbangan terhadap kualiti pelajaran yang dihasilkannya seperti yang umum di kalangan sebilangan rakyat tertentu sepuluh tahun dulu sudah mulai lenyap. Persoalan yang ditimbulkan sekarang bukan lagi keupayaan dan kemungkinannya tetapi bagaimana menempatkan setiap pelajar di dalam sistemnya, terutama di peringkat tinggi. Dan, dengan dedikasi dan pengorbanan anggota-anggota pasukan keselamatan serta kerjasama rakyat, keamanan dan ketenteraman sentiasa terjamin. Hakikat ini, dan juga kestabilan politik yang wujud oleh sikap tanggungjawab pemimpin-pemimpin yang unik dalam sebuah masyarakat majmuk, membolehkan ekonomi kita sentiasa dapat ditingkat dan dipertahankan, walaupun di tengah gelombang ekonomi dunia yang kurang sihat.

Tetapi ini semua telah berlalu; setengahnya telah pun menjadi sejarah. Seperti yang dikatakan oleh Perdana Menteri Datuk Seri Dr. Mahathir Mohamad dalam ucapannya melalui RTM ke seluruh negara malam tadi, untuk mencapai kemajuan selanjutnya seluruh rakyat haruslah mempunyai pandangan yang jelas terhadap hasrat dan masa depan negara dan menaruh sepenuh keyakinan terhadapnya. Hasrat itu ialah untuk mewujudkan masa depan yang penuh dengan kesejahteraan, kemakmuran, kemajuan dan keharmonian.

Ke arah ini, pentadbiran baru telah menjalankan segala yang terdaya dalam masa yang singkat. Ia mengambil sikap baru mendedahkan kelemahan-kelemahannya dan menerima tanggungjawab ke atasnya. Ia melaksanakan peraturan-peraturan baru serta membuat beberapa perubahan, walaupun tentunya menimbulkan rasa kurang senang yang bukan sedikit, semata-mata dengan tujuan mewujudkan segera pentadbiran bersih dan cekap yang dicita-citakannya. Tetapi ini semua adalah langkah-langkah pihak Kerajaan. Rakyat juga harus memainkan peranan masing-masing, dan, seperti nasihat Perdana Menteri, kita mestilah memainkan peranan itu serta menunaikan segala tanggungjawab dengan tekun, jujur dan berdisiplin. Segala sumber tenaga, masa, fikiran dan modal perlu digunakan sepenuhnya bagi menggerakkan negara ke tahap pembangunan yang lebih tinggi. Namun faedah-faedah pembangunan itu tidak mungkin dinikmati sepenuhnya oleh rakyat yang tidak bersedia untuk menggunakan sumber-sumber yang telah disediakan oleh Kerajaan. Jadi masa ini adalah masa untuk kita mengubah sikap serta bekerja, bukan untuk bercakap sambil mengharap.